

Morning Dogri (NSD) National News Bulletin 04-05-2024

आकाशवाणी

- लोकसभा चुनावें दे त्रिये गेड़ लेई चुनावें प्रचार पूरे जोरें-शोरें कन्नै चला'रदा ऐ, मतदान 7 मई गी होग।
- प्रधानमंत्री ते बीजेपी दे वरिष्ठ लीडर नरेन्द्र मोदी होर बिहार च जनसभा गी संबोधत करगंन।
- केन्द्र नै गंडे दे निर्यात उप्पर लग्गी दी रोक गी हटाई लैता ऐ।
- ब्राजील च आए दे हाड़ें करी 37 लोकें गी मौत होई गई ऐ ते केई लापता न।
- आईपीएल क्रिकेट च जंदी रातीं कोलकोता नाईट राईडर्स नै मुंबई इंडियन्स गी 24 रंजें कन्नै हराई दित्ता।



Campaign

लोकसभा दे चौथे गेड़ दे चुनावें प्रचार जोरें-शोरें चला करदा ऐ। प्रमुख सियासी पार्टिं दे बड्डे नेता मुख भरै च रैलियां ते रोड शो करै करदे न। इस गेड़ च 10 राज्यें ते इक केन्द्र शासत प्रदेश दी कुल 93 लोकसभा सीटें पर औंदे मंगलवारें वोट पाए जाने न। इनें राज्यें च असम, बिहार, छत्तीसगढ़, गोवा, गुजरात, कर्नाटक, मध्यप्रदेश, महाराष्ट्र, उत्तर प्रदेश, पच्छिम बंगाल, दादरा ते नागर हवेली ते दमन ते दीव शामिल न। तोआई केन्द्र शासत प्रदेश जम्मू कश्मीर दी अनंतनाग-राजौरी सीट लेई इस गेड़ तैह्त होने आले मतदान गी खराब मौसम ते शिड़कें दी माड़ी स्थिति दे चलदे अगड़ा पाई दित्ता गोआ ऐ। इस सीट लेई हुन 25 मई गी वोट पाए जांगन। सत्ताधारी ते बरोधी पार्टिं दे नेता मतदाताएं गी अपने पक्ख च करने लेई पूरी टिल्ल ला करदे न। तोआई चुनावें आयोग नै बी चुनावें गी बवस्था आले ढंगै सिर करोआने लेई लोड़चदे सब्बे प्रबंध कीते दे न।



PM-Jharkand

प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज दिनै 11 बजे झारखंड दे पलामू ते दपैहरी साढ़े 12 बजे गुमला जिले दे सिंसई च चुनावी रैली गी संबोधत करगंन। श्री मोदी होर 13 मई गी आम चुनाव दे चौथे गेड़ दे मतदान लेई पलामू थमां एनडीए दे मेदवारें बी. डी.राम ते लोहरदगा संसदी हल्के थमां समीर ओरांव हुंदे समर्थन च प्रचार करगंन। एह कुसै बी प्रधानमंत्री दी सिंसई दी पैहली यात्रा होग। श्री मोदी होर चुनाव प्रचार लेई झारखंड दे दऊं दिनें दे दौरे पर न जिसी दिक्खदे होई उत्थें सुरक्षा दे निगगर प्रबंध कीते गेदे न। मोदी होर अज्ज बडलै साढ़े 9 बजे रांची आले राजभवन थमां पलामू लेई रवाना होंगन।



PM Bihar

प्रधानमंत्री नरेन्द्र मोदी होर अज्ज बिहार दे दरमंगा च इक जनसभा गी संबोधत करगंन। श्री मोदी होर बीजेपी दे मेदवार गोपालजी ठाकुर हुदं समर्थन च दरमंगा दी राज ग्राउंड च दपैहरी तकरीबन 3 बजे चुनावी रैली गी संबोधत करगंन। इस दिक्खदे होई उत्थें सुरक्षा दे व्यापक प्रबंध कीते गेदे न। राष्ट्री जनता दल दे वरिष्ठ नेता ते मजूदा विधायक ललित कुमार यादव दरमंगा सीट थमां चुनाव लड़ा करदे न। लोकसभा चुनाव दे चौथे गेड़ च 13 मई गी दरमंगा संसदी इल्के च मतदान होग। इससै रोज समस्तीपुर, उजियारपुर, मुंगेर ते बेगुसराय च बी वोट पाए जांगन।



Gujrat Campaign

भारती जनता पार्टी दे वरिष्ठ नेता अमित शाह, कांग्रेस नेता प्रियंका गांधी ते आम आदमी पार्टी दे नेता भगवंत मान होर अज्ज गुजरात च चुनाव प्रचार करगंन। अमित शाह अज्ज छोटा उदयपुर, वलसाह ते कन्ने दमन ते दीव च पार्टी मेदवारें दे हक्कै च त्रै चुनावी रैलिंग गी संबोधत करगंन। कांग्रेस नेता प्रियंका गांधी बनासकांठा च पार्टी मेदवारें दे हक्कै च जनसभा गी संबोधत करगंन। आम आदमी पार्टी दे नेता ते पंजाब दे मुख्यमंत्री भगवंत मान, भरूच सीट परा पार्टी दे मेदवार चैतर बसावा हुंदे इक्कै च दऊं रैलिंग गी संबोधत करगंन।



Rajnath

भारती जनता पार्टी दे वरिष्ठ लीडर ते केन्द्री रक्षा मंत्री राजनाथ सिंह होरें कांग्रेस उप्पर आरोप लाया जे ओ मुख्खे गी धर्म दे नां उप्पर त्रुडना चांहदी ऐ ते उनें एह गल्ल कल हरियाणा दी रोहतक लोकसभा चुनां हल्कै च चुनां रैली दरान आक्खी। उनें आक्खेआ जे बीजेपी धर्म जां जाति दे आधार उप्पर राजनीति च जकीन नेई करदी। उनें आक्खेआ जे आजादी मगरा राष्ट्रपिता महात्मा गांधी होर चांहदे हे जे कांग्रेस गी भंग करी दित्ता जा, पर कांग्रेसिएं उंदी गल्ल दा मान नेई रक्खेआ। उनें महात्मा गांधी हुंदी इच्छा गी पूरा करने लेई लोकें गी किट्ठा होने दा आह्वान कीता। श्री राजनाथ सिंह होरें कांग्रेस लीडर राहुल गांधी हुंदे उप्पर बी नशाना साधेआ। उनें आक्खेआ जे कांग्रेसर गुजरात दी सूरत थाहर बीजेपी दे संसद गी निर्विरोध चुने जाने गी लोकतंत्र दी हत्या दस्सा'रदे न पर ओ एह गल्ल नेई जानदे ते अजें तोड़ी 28 बारी लोकसभा सांसद निर्विरोध चुने गे न जेहदे च 20 बारी कांग्रेस दे सांसद हे।



Centre Onion

केन्द्र सरकारै गंडें दे निर्यात पर लग्गी दी रोक गी हटाई दितता ऐ। विदेशी बपार सरबंधी महानिदेशालय नै इक अधिसूचना च आक्खेआ ऐ जे एह हुक्म फौरी प्रभाह कन्नै लागू होग। पिछले म्हीने केन्द्र सरकारै 6एं मुख्खें बंगलादेश, संयुक्त अरब अमिरात, भूटान, बहरीन, मॉरीशस ते श्रीलंका गी 99 ज्हार मिट्रिक टन गंडें दे निर्यात दी मजूरी दित्ती ही। पिछले ब'रे दिसम्बर च रबी ते खरीफ दी फसलं च कमी दे अंदाजे करी गंडें दी घेरलू उपलब्धता जकीनी बनाने लेई गंडें दे निर्यात उप्पर रोक लाई दित्ती गई ही।



Brazil Flood

दक्खनी ब्राजील च भारी बरखें ते हाड़ें करी 37 लोकें दी मौत होइ गई ऐ ते 74 लोक लापता बी दस्से जा'रदे न। इनें हाड़ें करी केई शैहर तबाह होइ गे न जेहदे चलदे ज्हारां बद्धे लोकें गी अपना घर-बार छोड़ियै सुरक्षत थाहरें पर जाना पेई गोआ ऐ। 80एं ब'रें च पैहली बारी आए दे इसै नेय विनाशकारी हाड़ें करी 23 ज्हार शा मते लोक बेघर होई गे न।

उआं एहदे शा पैहले पिछले ब'रे जुलाई, सितम्बर ते फही नवम्बर दे म्हीने दरान बी उत्थें हाडें करी कुल 75 लोकें दी मौत होइ गई ही। ब्राजील दे किश शैहरें च पानी दा स्तर इन्ना मता ऐ जिन्ना पिछले डेढ़ सौ ब'रे च कदें बी नेई रेआ। जंदे वीरवारें बेन्टो गॉनक्लेक्स ते कोटीपोरा बश्कार बनाए गेदे इक पन बिजली प्रोजेक्ट गी आंशिक तौर पर नुक्सान पुजजा जिस करी केई शैहर पानी हेठ डुब्बी गे।



Asean India

26में आसियान भारतीय वरिष्ठ ऐहलकारें दी बैठक कल नमीं दिल्ली च लग्गी। पूर्व दे सचिव जयदीप मजूमदार होरें सिंगापुर दे विदेश मंत्रालय च सीई सचिव अलबर्ट चूआ हुंदे कन्नै इस मीटिंग दी सह-अध्यक्षता कीती। इस मीटिंग च आसियान मुखें दे प्रतिनिधिएं, वरिष्ठ ऐहलकारें ते आसियान च ओबसर्वर ददा औहदा संभालने आले टिमोर लैस्टे होर बी शामिल हे। मीटिंग दरान भारत-आसियान बश्कार संपूर्ण सरबंधें ते राजनैतिक सुरक्षा, आर्थिक ते समाजिक संस्कृति बारे बी जायजा लैता गेआ। वरिष्ठ ऐहलकारें भारत-आसियान बश्कार व्यापक सामरिक सांझ-भ्याली गी होर तगड़ा करने लेई शुरू जकार्ता च होए दे 20में आसियान-भारत शिखर सम्मेलन च प्रधानमंत्री हुंदे आस्सेआ घोषत 12 प्रस्तावें गी लागू करने बारे बी चर्चा कीती। इस दरान आपसी हितेंदे इलाकाई ते कुल संसारी मुद्दें बारे बी बचार सांझे कीते गे।



IPL

अंतर्राष्ट्रीय क्रिकेट काउंसल दी ताजा रैकिंग मूजब भारत टी-20 ते इक रोजा अंतर्राष्ट्रीय मैचें च पैहले नंबरै पर बने दा ऐ जिसलै जे टैस्ट मैचें दे लिहाज कन्नै ओ दूई थाहरै पर ऐ। आईसीसी विश्व टैस्ट चैंपियनशिप दा जेत्तू आस्ट्रेलिया भारत गी पिच्छे छोड़ियै पैहले नंबरै पर आई गेआ ऐ ते हुन क्रिकेट दी गै इक होर खबर। आईपीएल च जंदी रातीं मुंबई दे वानखेडे स्टेडियम च खेड्डे गेदे इक मैच च कोलकाता नाईट राईडर्स नै मुंबई इंडियन्स गी 24 रंजें कन्नै हराई दित्ता। जित्त लेई लोडचदे 170 रंज दे लक्ष्य दा पिच्छा करदे होई मुंबई इंडियन्स दी पूरी टीम 145 रंज पर गै आउट होई गई।

अज्ज बैंगलुरु दे एम.ए.चिन्नास्वामी स्टेडियम च गुजरात टाइटंस दा मकाबला रॉयल चैलेंजर्स बैंगलोर कन्नै होग। मैच संजा साढे 7 बजे होग।

<><><><><><>